

TILKYNNING

um lækkun á gjaldskrár hitaveitna og rafveitna.

Við undi-húning nýgerðra kjarasamninga beindi ríkisstjórnin þeim tilmælum til sveitarfélaga að gjaldskrár rafveitna yrðu lækkaðar um 10% og gjaldskrár hitaveitna um 7%.

Jákvæð viðbrögð fengust við þessum tilmælum og í framhaldi af því ákvað ríkisstjórnin, með lögum nr. 3, 1. mars 1986, um ráðstafanir í ríkisfjármálum, verðlags- og lánsfjármálum 1986, að verðjöfnunargjald af raforkusölu yrði fellt niður, frá og með 1. mars 1986.

Með vísan til framanritaðs hefur iðnaðarráðuneytið óskað eftir því að öll orkufyrirtæki landsins sendi ráðuneytinu, til staðfestingar og birtingar, nýjar gjaldskrár og tekur fram, að þar sem hér er um ívilnandi stjórnvaldsaðgerð að ræða geti gjaldskrárnar tekið gildi frá og með 1. mars 1986, þótt þær verði ekki birtar í B-deild Stjórnartíðinda fyrr en eftir þann dag.

Iðnaðarráðuneytið, 1. mars 1986.

F. h. r.

Páll Flygenring.

Guðrún Skúladóttir.

26. febrúar 1986

Nr. 107

AUGLÝSING

um undanþágu frá greiðslu söluskatts af fjármögnunarleigu.

1. gr.

Þrátt fyrir ákvæði 7. tl. 10. gr. reglugerðar nr. 486/1982 um söluskatt með síðari breytingum skal ekki innheimta söluskatt af greiðslum sem inntar eru af hendi samkvæmt samningum um fjármögnunarleigu, sbr. 3. gr., á vélum, tækjum og búnaði sem getið er um í 2. gr. og notaðar eru í atvinnurekstri, enda séu önnur skilyrði auglýsingar þessarar uppfyllt.

2. gr.

Undanþága frá greiðslu söluskatts skv. 1. gr. tekur einugis til samninga um fjármögnunarleigu á vélum og tækjum sem falla undir 84.—90. kafla og 92. kafla 1. gr. tollskrárlaga nr. 120/1976 með síðri breytingum. Jafnframt skal kaupverð þeirra véla og tækja sem hver einstakur samningur tekur til aldrei vera lægra en 250 000 kr. samtals.

Af greiðslum skv. samningum um fjármögnunarleigu á öðrum vörum en um ræðir í 1. mgr. þessarar greinar, svo sem af verkfærum, áhöldum, húsgögnum, innréttingum, byggingarefni og hlutum til mannvirkja, skal ætíð greiddur söluskattur.

3. gr.

Undanþága frá greiðslu söluskatts skv. 1. gr. tekur einungis til samninga sem gerðir eru a. m. k. til þriggja ára. Þá skal í samningum þessum kveðið á um rétt leigutaka til þess að framlengja samninginn á þann veg að reglubundnar greiðslur til leigusala verði ekki hærri en sem svarar 1/10 hluta af fyrri greiðslum fyrir jafnlangt tímabil, að teknu tilliti til verðlagsþróunar. Samningsaðilum skal vera óheimilt að segja samningum þessum upp á samningstímanum nema um sé að ræða vanefndir af hálfu annars hvors þeirra á skyldum sínum samkvæmt þeim.

4. gr.

Söluskattur skal ætíð greiddur við kaup eða innflutning leigusala á tækjum sem um ræðir í 2. gr. Sé leigusali framleiðandi leigumunar skal greiða söluskatt af honum í síðasta lagi við afhendingu hans til leigutaka.

Falli starfsemi leigutaka undir reglur um samkeppnisiðnað skulu reglur 3. og 4. gr. auglýsingar nr. 8/1981 gilda eftir því sem við getur átt um innflutning eða kaup leigusala á leigumun sem getið er í 1. gr. nefndrar auglýsingar.

5. gr.

Aðilar sem stunda söluskattsfrjálsa fjármögnunarleigu (leigusalar) skulu tilkynna viðkomandi skattstjóra um þennan þátt starfsemi sinnar innan mánaðar frá því að auglýsing þessi tekur gildi. Á sama hátt skulu þeir sem hefja starfsemi af þessu tagi eftir að auglýsing þessi tekur gildi tilkynna það skattstjóra um leið og starfsemin hefst. Ákvæði 5. gr. reglugerðar nr. 486/1982 um söluskatt skulu gilda um tilkynningar þessar eftir því sem við getur átt.

6. gr.

Séu skilyrði auglýsingar þessarar uppfyllt skal leigusali ekki innheimta söluskatt af leigu skv. samningum um fjármögnunarleigu. Viðskiptum þessum ber að halda greinilega aðgreindum í bókhaldi. Stundi leigusali jafnframt söluskattsskylda starfsemi ber honum að gera grein fyrir viðskiptum þessum á viðeigandi hátt á söluskattsskýrslu.

Fjármálaráðherra getur, ef sérstakar ástæður eru fyrir hendi vikið frá skilyrðum þeim sem sett eru í reglugerð þessari.

7. gr.

Að svo miklu leyti sem ekki er sérstaklega kveðið á um annað í auglýsingu þessari skulu ákvæði reglugerðar nr. 486/1982 um söluskatt með síðari breytingum gilda um framkvæmd hennar.

8. gr.

Auglýsing þessi, sem sett er skv. heimild í lögum nr. 10/1960 um söluskatt með síðari breytingum, öðlast þegar gildi.

Fjármálaráðuneytið, 26. febrúar 1986.

Þorsteinn Pálsson.

Lárus Ögmundsson.